

Naqqiut

Siusinnerusukkut 10. oktober 2016-imi nassiunneqarsimasumut taartaasoq.
(Naalakkersuisup taaguutaa allangortinneqarpoq naalakkersuisoqarfiit allangortinneqarnerisa aammalu immikkoortumi 9-mi annikittumik nassuiaasoqarnerup kingunerisaanik)

Apeqquteqaat aallaavigalugu oqallinnissamik siunnersuut: Ineqarnikkut aaqqissuusseqqinnerup innuttaasunut amerlanerpaanut ataavannerusumik iluaqutissannqortinnissaa qanoq qulakkeerneqarsinnaava aammalu inuiaqatigiit akornanni akissarsiakinnerit akunnattumillu isertitaqartartut akilersinnaasaannik ineqarnikkut qanoq aaqqissuussinnaavugut

(Inatsisartuni ilaasortaq Jess Svane, Siumut)

Akissuteqaat

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

Siullermeerneqarnera

Naalakkersuisut sinnerlugit apeqquteqaat aallaavigalugu oqallittoqarnissaanut qujavunga, siunissami isertitakitsut akunnattumillu isertitaqartartut qanoq iliorluta aningaasaqarnikkut nammassinnaasaminnik ineqartinneqarsinnaanissaat pillugu Inatsisartuni oqallinnissaq periarfissinneqarmat.

Inissiat pitsaanngitsuusut siunnersuuteqartup ilaatigut taavaa. Innuttaasut peqqinnartunik pitsaasunillu angerlarsimaffeqarnissaannik, aammalu isertitakitsut akunnattumillu isertitaqartartut aningaasaqarnerisa iluanni periarfissiiffiusinnaasunik ineqarnermut akiliuteqartitsisarnissap qulakkeerneqarnissaata pingaaruteqarneranut Naalakkersuisut isumaqataapput.

Tamatuma peqatigisaanik Naalakkersuisut ineqarnermi suliniutinik arlalinnik, ataatsimoorlutik aningaasat ineqarnermut atorpeqartussat pitsaanerpaamik atorpeqarnissaannut qulakkeeriffiusussanik suliaqarput.

Kommunini aaqqissuusseqqinnermut ataatsimiititaliarsuup inassuteqaataani 2005-imeersuni ilaatigut allassimavoq, Namminersorlutik Oqartussat inissiaataat kommuninut tunniunneqassasut. Inissiat kommuninut tunniunneqarnissaat pillugu isumaqatiginninniarnissanut tunngavissatut Naalakkersuisut Namminersorlutik Oqartussat inissiarsuaataannut pilersaarusiornermik aallartitsipput.

Immikkoortumut pilersaarutit 2017-imi piareernissaat naatsorsuutigineqarpoq. Immikkoortunut pilersaarutini Namminersorlutik Oqartussat inissiarsuaataanni inissiat aserfallatsaaliorneqarnermikkut qanoq innerat paasineqassaaq. Immikkoortumut pilersaarutini inissiat suut iluarsaanneqassanersut aammalu suut isaterneqartariaqarnersut, sumilu inissianik pisariaqartitsineq naammassiniarlugu nutaanik inissialiortoqartariaqarnersoq pillugu inassuteqaatinik aalajangersimasunik saqqummiussisoqassaaq.

Aningaasanut inatsisini ataasiakkaani Namminersorlutik Oqartussat inissiaataanni iluarsaassinissamut isaterinissamullu aningaasarpassuarnik immikkoortitsisoqarsimavoq, taamaattumillu kommunit inissianik tigusisussanngorpata, inissiat toqqissisimanartumik tunniunneqarsinnaassapput.

Sanaqateqarluni illuliortarneq eqqarsaatigalugu erseqqissaatigissavara, aningaasaliissutit taakku kommuninut nuunneqartussaasut, aammalu ukiumoortumik ataatsimoortumik tapiissutinut ilaasartussaallutik. Taamaalilluni kommunit taakkununga ukiumoortumik aningaasaliissutinik ilisimasaqareertarnissaat, suliassaqarfimmilu ingerlaavartumik tulleriarisinaanissaat qulakkeerneqassaaq.

Inissianik attartortittakkanik kommunimut tunniussineq kommunit inissianik pisariaqartitsiviunerpaasuni sanaartorsinnaanissaannut, aammalu inissiat piumaneqarnerat malillugu angissusiinut innuttaasullu akiliisinaanassusiinut naleqqussaasinnaanissaannut qulakkeereqataassaaq.

Innuttaasut pisinnaasut inissianik imminnut pilersorsinnaanissaat Naalakkersuisut kissaatigaat. Tamaattumik Naalakkersuisut Napatitsinermut Siuariartornissamullu Pilersaarusiame suliniutit arlallit, inissianik piginnittunut sinaakkusiussat pilerinartuunissaannut siumullu ilisimasaqareertarnissamut qulakkeerisussat allaaseraat.

Tassani ilaatigut pisortat taarsigassarsititsisarnerisa iluarsineqarnissaa, taamaalillunilu niuerfimmuq naleqquttunngortinneqarnissaa pineqarpoq. Assersuutigalugu illoqarfinni minnerni nunaqarfinnilu, aningaasalersuinissap angunissaanut ajornakusoortitsiviusinnaasuni piginneqatigiilluni inissianik pilersitsinissaq ajornarunnaarsinneqassaaq. Tassalu illoqarfinni minnerni nunaqarfinnilu amerlanerusunik taarsigassarsititsisoqarsinnaalersillugu inatsit ilusilerneqarsinnaavoq. Kiisalu Namminersorlutik Oqartussat piginneqatigiilluni inissiatillit peqatigiiffiinut mikisunut suliassanik nalinginnaangorsakkanik suliqaarsinnaapput, taamaalillunilu illoqarfinni minnerni nunaqarfinnilu piginneqatigiilluni inissiatillit peqatigiiffiinik minnernik aallartitsinissaq ajornanginnerulersinneqassalluni.

Taamatutaaq ernianut ilanngaatit ernianut tapiissutinut allanngortinneqarnissaat siunnersuutigineqarpoq, taamaalillunilu akissarsiakitsut akunnattunillu isertitaqartartut pitsaanerusunik atugaqalersinniarlugit tapiissutit siunnerfeqartinneqarnissaat ajornarunnaarsinneqassaaq. Kiisalu ineqarnermut peqqussutip iluarsaanneqarnerani aningaasaliisussat namminersortut inunnuq akiliisinaanassusilinnut, kisiannili namminneerlutik inissianut aningaasaleerusunngitsunut illuutitut attartortittakkanut aningaasaliisinaanernerit tunngavissiisoqassaaq.

Inuit inissianik pilersuinermit aningaasaliisartut amerlanerulernerini, kommunit (pisortat) innuttaasuni aningaasaqarnikkut sannginnerpaat inissianik pitsaasunik akikitsunillu inissaqartinneqarnissaannut periarfissaqarluarnerulissapput.

Taamatut oqaaseqarlunga immikkoortoq Inatsisartuni suliarineqartussanngorlugu tunniuppara, aammalu oqallinnermut tusarnaarnissaannut qilanaarpunga.